

Erthyglau, llythyrau at y Prif Olygydd:

Y Parchg Ddr Alun Tudur
39 Dorchester Avenue, Pen-y-lan,
Caerdydd, CF23 9BS
Ffôn: 02920 490582
E-bost: aluntudur@btinternet.com

Golygyddion

Y Parchg Iwan Llewelyn Jones
Fronheulog, 12 Tan-y-Foel,
Borth-y-gest, Porthmadog, Gwynedd,
LL49 9UE
Ffôn: 01766 513138
E-bost: IwanLlew@aol.com

Alun Lenny
Porth Angel, 26 Teras Picton
Caerfyrddin, Sir Gâr, SA31 3BX
Ffôn: 01267 232577 /
0781 751 9039
E-bost: alunlenny@hotmail.co.uk

Archebion a thaliadau i'r Llyfrfa:

Tŷ John Penri, 5 Axis Court, Parc
Busnes Glanrafon, Bro Abertawe
ABERTAWA SA7 0AJ
Ffôn: 01792 795888
E-bost: undeb@annibynwyr.org

Dalier Sylw!

Cyhoeddir y Pedair Tudalen
Gydenwadol gan Bwyllgor Llywio'r
Pedair Tudalen ac nid gan Undeb yr
Annibynwyr Cymraeg. Nid oes a
wnelo Golygyddion Y Tyst ddim â
chynnwys y Pedair Tudalen.

'Y Ffordd' yn Tanio Dychymyg Pobl y De

Er gwaetha'r tywydd gwlyb a garw, fe wnaeth bron i 100 o Annibynwyr o bob rhan o dde Cymru ymgynnull yng nghapel Bethania, Tymbl ger Llanelli ar gyfer lansio cynllun Y Ffordd yn y de. Roedd y cyflwyniad gan Dr Noel Davies ac aelodau o staff yr Undeb, mewn geiriau a thrwy gyfrwng fideo, yn esbonio cynnwys a bwriad Y Ffordd mewn modd bywiog a gafaelgar. Fel y cyhoeddwyd yn y gogledd y wythnos flaenorol, mae'r Ffordd yn gynllun pedair blynedd sy'n annog trafodaeth ffres ac eang ar natur y ffydd Gristnogol. Dyma'r strategaeth gyntaf o'i bath gan enwad Cristnogol yng Nghymru, ac fe gafodd y lansiad yng Nghapel Coffa Cyffordd Llandudno sylw eang ar radio a theledu.

Cyfringau Cyfoes

Llywyddwyd y cyfarfod ym Methania gan Dr Geraint Tudur, Ysgrifennydd Cyffredinol yr Undeb. Cafwyd darlenniad gan Alun Lenny, Swyddog Cysylltiadau Cyhoeddus a'r Wasg, a gweddi gan y Parchg Gareth Morgan Jones, gweinidog Bethania.

Cafodd y gynulleidfa gyfle i gael blas o'r fideos newydd, a bu Rhodri Darcy, y Swyddog Hyrwyddo a Chyfathrebu, yn esbonio ychydig o'r broses dechnegol. Bu'r Parchg Robin Samuel, Swyddog Cyswllt ac Adnoddau'r Undeb yn y de, yn cyflwyno'r amrywiaeth o ddeunydd newydd sydd ar gael ar gyfer eglwysi a grwpiau trafod. Cafwyd neges trwy gyfrwng fideo gan y Parchg Aled Jones o



Goleg yr Annibynwyr yn esbonio rôl y coleg yn y cynllun, cyn i'r Parchg Jill-Hailey Harries, darpar-lywydd yr Undeb, rhoi gair o anogaeth i'r eglwysi i fwrw ati gyda'r Ffordd.

Tanio Dychymyg

Ar ddiwedd y cyfarfod, roedd hi'n amlwg bod dychymyg y gynulleidfa wedi cael ei danio wrth i bobl giwio i gael eu pecyn. Tra roedd pobl yn dal i drafod ymhlith ei gilydd dros gwpaned o de ar ddiwedd y noson, fe'i holwyd gan Alun Lenny gyda Rhodri Darcy yn gweithio'r camera ar gyfer sianel Annibynwyr Cymru. Roedd yr ymateb yn frwd iawn, ond roedd pobl hefyd yn ymwybodol o'r her o gyfleu'r brwdfrydedd yma i'r cynulleidfaoedd yn yr eglwysi ar lawr gwlad. Mewn dyddiau digalon, mae'r Ffordd yn cynnig modd i adfywio ein ffydd a meithrin yr hyder i fynd â'r efenngyl i'n cymunedau.

Y TYST

Sefydlwyd 1867

Cyfrif 149

Rhif 41

Hydref 6, 2016

50c.

CAPELI GWAG: Cyngor yn galw am Strategaeth Genedlaethol

Ar draws ein gwlad mae capeli, eglwysi ac adeiladau mawr eraill yn wag ac yn mynd a'u pen iddynt. Dyna ysgogodd Cyngor Sir Gaerfyrddin i alw ar Lywodraeth Cymru i lunio strategaeth genedlaethol i fynd i'r afael â'r broblem. Mae'r Cyngor hefyd yn galw am gyllid ychwanegol i droi'r adeiladau segur yma'n fflatiau i'w gosod ar rent neu eu gwerthu er mwyn darparu cartrefi i bobl leol.

Gofid a Gwewyr Cau'r Capel

Wrth gynnig gwelliant i Rybudd Gynnig ar y mater, dywedodd y Cyngorydd Alun Lenny: "Pan mae capel yn cau, y cyfan mae'r cyhoedd yn ei weld yw'r arwydd

"Ar Werth" y tu fas i'r adeilad. Dy' nhw ddim yn gweld y gofid a'r gwewyr calon mae'r gweddill ffyddlon, dyrnaid o aelodau oedrannus rhan amlaf, yn mynd trwyddo wrth orfod dwyn yr achos i ben, am fod cynnal y capel wedi mynd yn ormod o faich." Eiliwyd y gwelliant gan y Cyngorydd Tom Defis. "Fel Cadeirydd Pwyllgor Bugeiliol Cyfundeb Gorllewin Caerfyrddin, rwy' mewn cysylltiad nawr â saith o eglwysi Annibynnol sy'n ystyried eu dyfodol," meddai. "Mae gofid yr aelodau ynglyn â beth all ddigwydd i'r adeilad yn achosi pryder mawr." Dywedodd y byddai'r gofid yna'n cael ei leddfu o wybod y

gallai'r adeilad gael defnydd gwerthfawr trwy ddarparu cartrefi i bobol leol sy'n awchu am gartref.

Cynllunio a Cadw

Ffactor bwysig mewn newid defnydd capel neu eglwys yw'r ffaith bod cannoedd wedi cael eu cofrestru gan Cadw. "Mae'r fath adeiladau'n rhan bwysig a gweladwy o'n hanes ni fel cenedl," meddai Alun Lenny. "Ond, fel Cadeirydd y Pwyllgor Cynllunio, mi wn o brofiad am y problemau sy'n gallu codi pan fod datblygwr am droi hen gapel neu eglwys yn fflatiau neu'n dŷ byw. O ganlyniad mae nifer yn dadfeilio, yn cael eu fandaleiddio a hyd yn oed yn cael eu rhoi ar dân."

Wrth basio'r gwelliant, cytunodd Cyngor Sir Gâr bod angen trafodaeth genedlaethol ar frys, o dan arweiniad Llywodraeth Cymru, er mwyn llunio strategaeth. Dylid gwahodd enwadau crefyddol ac eraill i ymuno yn y drafodaeth honno.



Cwrdd Chwarter Llyn ac Eifonydd yn cofio Gweinidog, Cenhadwr ac Emynydd

Cyfarfu Cwrdd Chwarter Cyfundeb Llŷn ac Eifonydd ym Maesyneuadd, Trefor, gyda Mr. Trefor W. Jones, Chwilog, yn gadeirydd a Mrs. Megan Roberts, Trefor, yn cyfeilio. Darllenwyd o Efengyl Marc pennod 16 gan Mrs. Jean Roberts ac yna fe'n harweiniodd mewn gweddi bwrpasol.

O'r Cofnodion

Nodwyd fod Capel Salem, Y Ffôr a'r Tŷ Capel ar fin cael eu gwerthu ac ystyriwyd materion ynghylch Ymddiriedolaeth Capel Newydd Nanhoron.

Deddf Tai Cymru

Darllenwyd llythyr oddi wrth Ysgrifennydd yr Undeb, Y Parchg Ddr. Geraint Tudur, yn tynnu sylw at ofynion Deddf Tai Cymru 2014 - deddf oedd yn berthnasol i Ymddiriedolwyr eglwysi Cymru. Cyn Tachwedd 2016, roedd rheidrwydd ar i ymddiriedolwyr pob mans, tŷ capel ac unrhyw dai eraill y mae eglwysi yn eu rhentu sicrhau eu bod wedi cael eu cofrestru. Dymunwyd fod llythyr holl eglwysi'r Cyfundeb yn digwydd ynghylch hynny.

Sefyllfa Anodd

Darllenwyd llythyr yn enw'r Parchg Ddr. R. Alun Evans, Llywydd yr Undeb, a'r Dr Fiona Gannon, Cadeirydd Cyngor yr Undeb, yn dweud na ellid cadarnhau enw'r Parchg Euros Wyn Jones, a enwebwyd gan Gyfundeb Llŷn ac Eifonydd yn Ddarpar-Lywydd yr Undeb - ymysg Cyfundebau eraill, "oherwydd gwrthdaro buddiannau posib rhwng dwy elusen - y Coleg a'r Undeb."

Swyddog Cynnal ac Adnoddau

Darllenwyd neges y Parchg Casi M. Jones, Swyddog Cynnal ac Adnoddau'r Undeb, yn diolch am y croeso a dderbyniodd yn y Cyfundeb ac am y sesiynau a gynhaliwyd

ar gyfer yr eglwysi ym Mhwlheli, Chwilog a Threfor. Cytunwyd â'i chais i gyfarfod Pwyllgor Bugeiliol y Cyfundeb cyn y Cwrdd Chwarter nesaf. Carai hefyd dynnu sylw at 'Gynllun Y Ffordd, cynllun newydd sydd gan yr Undeb sydd i gael ei lansio ym mis Medi.

Cymru Dros Heddwch

Darllenwyd llythyr Jane Harries, Cydlynnydd Cymru Dros Heddwch, yn dymuno cymorth gweinidog i wneud mewnbyn yn Ysgol Maelor, Wrecsam, ar Orffennaf 15 ar agweddau tuag at ryfel a heddwch - ddoe a heddiw. Awgrymwyd enwau rhai cyfeillion a allai fod â diddordeb.

Trosglwyddo Cadair y Cyfundeb

Mewn geiriau dethol cyflwynodd y Cadeirydd, Mr. Trefor W. Jones, gadair y

mwyr ar dudalen 2



Cwrdd Chwarter Llyn ac Eifonydd yn cofiu Gweinidog, Cenhadwr ac Emynydd - *parhad*

Cyfundeb i'w olynnydd, Mr. Dafydd O. Roberts, diacon ym Maesyneuadd, Trefor. Mynegydd diolch i Mr. Trefor W. Jones am ei arweiniad a'i hynawsedd fel Cadeirydd dros y ddwy flynedd. Dymunwyd yn dda i'r Cadeirydd newydd.



Dafydd Roberts

Ieuan o Llyn

Yn ei anerchiad cyfeiriodd Mr. Dafydd O. Roberts ar ddigwyddiad arbennig a fu yn y Cyfundeb ar achlysur ddatlu daugan-mlwyddiant sefydlu Cymdeithas Genhadol Llundain. Ar Orffennaf 8, 1995, adroddir fel y bu i tua chant o Annibynwyr ymgynnull yn Rehoboth, Llanestyn, un o eglwysi'r Cyfundeb, mewn cyfarfod arbennig, a lywyddwyd bryd hynny gan Mr. Huw Williams, Bwlchtocyn, a lle'r adroddodd y diweddar Barchg. Pierce Jones, Borth-y-gest, hanes y Genhadaeth. Wedi'r oedfa yn y capel, aeth y gynulleidfa i Dy'n-y-pwll, lle ganed y cenhadwr, y gweinidog a'r bardd, y Parchg John Henry Hughes, *Ieuan o Llyn*, ar 11 Hydref 1814, Dadorchuddiwyd cofeb iddo yno gan Mrs. Ella Roberts, ac adroddwyd ei hanes gan y diweddar Barchg. Gwyn Jones, Llandudno. Soniodd fel yr addysgwyd Ieuan o Llyn yn Ysgol Botwnnog cyn mynd am gyfnod yn athro cynorthwyol i'r ysgol a gedwid gan Arthur Jones ym Mangor. Wedi bod yng Ngholeg yr Annibynwyr yn Aberhonddu, ordeiniwyd John Henry Hughes yn weinidog Llangollen ym 1843. Ym 1847, aeth yn weinidog o genhadwr i Eglwys Gynulleidfaol Demerara, Guyana, De America. Dychwelodd oddi yno, ar gyfrif afiechyd ei briod. Bu'n weinidog wedi hynny yn West Hartlepool, Horsely-upon-Tyne, Newent, a'r Cefn Mawr, ger Wrecsam. Yn Wrecsam y bu farw ar 7 Mawrth 1893. Gwnaethai enw iddo'i hun fel bardd ac emynydd. Cafodd cyfrol o'i bregethau Saesneg, *The Hand that Saves and Other Sermons*, ei gyhoeddi ym 1895. Wedi diolch i Mr. Dafydd O. Roberts am ei anerchiad diddorol, canwyd y pennill cyntaf o emyn Ieuan o Llyn, "*Wele wrth y drws yn curo.*"

Ioan W. Gruffydd,
Ysgrifennydd y Cyfundeb

Diolch yn fawr

Dyma uchod oedd rhai o eiriau'r Parchg Jacob B. Hahn o Gorea ar lwyfan neuadd Dewi Sant, Caerdydd, mewn cyngerdd bythgofiadwy. Roedd mintai o dros gant o Gristnogion Corea wedi talu eu ffordd eu hunain i ddod i Gymru ar berwyl arbennig. Ar ben hynny talasant am y neuadd fel y gallai pawb a fynnai fynychu'r dathlu wneud hynny yn rhad ac am ddim. Y perwyl arbennig oedd dod i ddiolch i genedl y Cymry am anfon Robert Jermain Thomas atynt 150 o flynyddoedd yn ôl, ym 1866, i rannu'r newyddion da am Iesu Grist. Ef blannodd hedyn yr Efyngyl, a dyfodd yn goeden gref yng Nghorea, o dystiolaeth a bywyd egniol Cristnogol. Yno y mae rhai o'r eglwysi Protestannaidd a Phresbyteraidd mwyaf yn y byd ac maent yn olrhain y cychwyn i'r Cymro o Lanofor. Yr oedd elfen o anesmwythyd yn ein plith fel Cymry yn y dathliad oherwydd eu bod hwy mor ddiolchgar â ninnau yn ymwybodol o'r trai Cristnogol a'r diffyg bywyd yn ein plith.



Jacob B. Hahn

Dim Anrhydedd

Gwir y gair a ddywed, nid oes anrhydedd i broffwyd yn ei wlad ei hun. Ychydig o sylw a roddwn ni i'n harwyr ein hunain fel cenedl yn enwedig y rhai Cristnogol. Fe'n cyfareddir gan arwyr estron y diwylliant Eingl-Americanaidd ac weithiau y mae'n cymryd pobl o'r tu allan i ddsygu i ni arwyddocâd ein harwyr brodorol. Cristion o Gymro a godwyd yn genhadwr yn Eglwys Annibynnol Llanofor oedd Robert Jermain. Ganwyd ef ar y 7fed o Fedi 1839 yn fab ieuengaf i Robert Thomas a oedd yn weinidog gyda'r Annibynwyr. Deuai ei dad yn wreiddiol o Rosllannerchrugog lle y bu o dan adain "yr hen seraff" William Williams o'r Wern un o bregethwyr mwyaf dylanwadol Cymru yn ei gyfnod. Cwmwd bychan yw'r Wern, ergyd bwa, o Rosllannerchrugog. Wedi cyfnod o hyfforddiant yn Athrofa'r Drenwydd fe'i hordeiniwyd yn weinidog i'r Arglwydd Iesu ar Eglwys Siloah, Glandŵr, Abertawe. Cynhaliwyd y cyfarfodydd ordeinio ar y 18fed a'r 19eg o Ebrill 1837. Yr oedd yn olynnydd i'r Parchg D. Evans, Mynyddbychan a'r Parchg E. Griffiths, Abertawe. Parhaodd y cyfarfodydd ordeinio am ddeuddydd ac ymhlith y rhai a gymerodd ran oedd David Rees, Llanelli, T Davies, Abertawe a rhoddwyd y siars gan William Williams o'r Wern a oedd yn weinidog yn Lerpwl ar y pryd. Dim ond am ddwy flynedd y bu yng Nglandŵr cyn iddo dderbyn galwad i Eglwys Annibynnol



Robert Jermain Thomas

Rhaeadr Gwy ym 1839. Oddeutu blwyddyn wedi ei ddyfodiad torrodd diwygiad grymus allan. Derbyniodd tua 100 o aelodau i'r eglwys yn y flwyddyn 1841 ac wedi hynny bu cynnydd graddol yn aelodaeth yr Eglwys. Ym 1848 wedi cyfnod o naw mlynedd symudodd i eglwys Annibynnol Llanofor, ger y Fenni. Erbyn hyn roedd Robert Jermain yn fachgen 9 oed ac yr oedd eisoes wedi dod o dan ddylanwad yr Efyngyl. Bu'n dyst i bregethu grymus, gweddio eneiniedig ac efyngylu brwdfrydig a gwelodd yn ifanc pa mor bwysig oedd cenhadaeth i ffyniant achos Iesu yma yng Nghymru. Defnyddiodd Duw y dylanwadau hyn er mwyn ei alw i genhadaeth ehangach, cenhadaeth dramor. Fe'i merthyrwyd ar draeth yng Nghorea wrth roi Beibl i filwr ac yntau yn ddim ond 26 oed.

Dirgrynu

Yn y dathliad cafwyd cyflwyniadau grymus gan Sound of Wales, Côr y Brenin o Gorea, Côr Cambrensis o Gymru, tympanau a dawnsyr traddodiadol, gweddiâu tairieithog cyn i'r cyngerdd/loedfa gyrraedd uchafbwynt gyda chyfnod o weddi eneiniedig gan Y Parchg Jacob B. Hahn. Go brin y gwelodd Neuadd Dewi Sant y fath beth erioed wrth i weddiâu'r saint atseinio'n ddiabedain trwy'r lle yn un llif gorfoleddus. Rwy'n siŵr fod yr adeilad yn dal i ddirgrynu yn awr o ganlyniad i'r profiad.

Gwerthfawrogiad

Wrth gyfarch y gynulleidfa fawr o dros 1,600 dywedodd y Parchg Jacob B. Hahn, "Y mae'r eglwys Brotestannaidd yng Nghorea mewn dyled ysbrydol i Gymru. Y mae hyn oherwydd eu bod wedi anfon Thomas i Gorea. Gwlad oedd mewn trwmgwsg gan nad oedd wedi derbyn yr Efyngyl. Ym 1866 gwaeddodd Thomas "Iesu" o'r llong General Sherman, oedd ar dân wrth iddo daflu Beiblaul i'r lan. Defnyddiodd un o'r milwyr y Beibl i bapuro ei dŷ. Daeth hwnnw yn gartref i Eglwys Noltari, yr eglwys Brotestannaidd gyntaf yng Nghorea. Yr ydym ni sydd yma heddiw o Gorea yn ffrwythau Cymru, mamwlad Thomas. Yr ydym am fynegi ein diolch mawr a'n parch i Gymru ac i deulu Thomas am ei anfon i Gorea. Gweddwn y bydd Eglwys Cymru yn cael cip olwg o'n diolchgarwch yn ein dathlu."


Gofynnodd i'r gynulleidfa i weddio am 2 beth. Yn gyntaf, i weddio am uno Gogledd a De Corea fel un wlad ac yn ail, gweddio y bydd 200 mil o bobl Cymru yn dod i greu yn Iesu Grist. Yr oedd eu brwdfrydedd yn heintus ac yn cyffwrdd ein calonnau yn ddwfn iawn. Wrth i ninnau fyfyrto ar hanes rhyfeddol Robert Jermain dylai ein hysbrydoli i weld unwaith eto bwysigrwydd cenhadu ac efyngylu a rhannu'r newyddion da am Iesu yn ein gwlad ein hunain. O na foed i ni, Gristnogion Cymru gael ein tanio gan yr hanes hwn i fynd allan i'n cymunedau ac at ein cyd-Gymry i rannu cariad Duw yn Iesu.

Barn Annibynnol

NEWID!

Yn rhyfeddu wrth ddarllen yn ddiweddar am gapel sy'n dal i ddefnyddio hen lyfr emynau'r enwad mae'n perthyn iddo. Ys gwn i a oes capeli eraill nad ydynt wedi newid i *Caneuon Ffydd* eto?

Mae'r cyndynrwydd i newid yn rhywbeth sy'n perthyn i'r byd a'r betws, wrth gwrs. Yn cofio bod mewn cyfarfod un tro lle'r oedd person yn gwrthwynebu unrhyw newid i batrwm ysgolion lleol. Eto i gyd, bu'r union berson yn ddigon parod i newid ei arferion aredig dros y blynyddoedd, gan roi heibio'r ceffylau gwedd a throi at yr offer amaeth mwyaf modern!



Elastig

Bron yn ddieithriad, mae gwrthwynebiad i unrhyw newid ac yn aml iawn y mae'n wrthdaro. Hyd yn oed pan mae'n gwbl amlwg fod newid yn angenrheidiol, ein tuedd yw dilyn y llwybr rhwyddaf a gwneud y peth lleiaf traferthus, a glynu at y status quo! Gadewch lonydd i ni.

Gadewch i ni fod. Does dim blynyddoedd mawr o'n blaenau. Gadewch i'r genhedlaeth nesaf ddelio ag unrhyw newid.

Yn cofio gweinidog newydd un tro'n addo wrth ei aelodau y byddai'n gwneud ei orau drostynt ond iddynt gofio nad elastig mohono! Mae lle i ofni bellach fod yr elastig yn tynhau a bron â thorri yn achos rhai o'n gweinidogion prin a hynny'n aml oherwydd ein cyndynrwydd ni i addasu a newid a bod yn hyblyg i gwrdd â'r amseroedd.

Digyfnewid

Mae Duw'n ddigyfnewid, ond dyw hynny ddim yn golygu na ddylai'r capel neu'r eglwys beidio â newid. Dim o gwbl! Y gwir yw bod y capeli a'r eglwysi mwyaf effeithiol yn newid yn gyson. Yr unig beth sy'n newid pan nad ydyn ni'n barod i newid yw'r broblem sy'n mynd yn waeth! Meddyliwch am y trefi a'r pentrefi yng Nghymru heddiw y gwyddom yn dda yn ein calon fod angen newid sylfaenol i'r drefn er mwyn i'r addoli a'r cenhadu fod yn fwy effeithiol a dylanwadol. Y sefyllfaoedd hynny lle mae capelyddiaeth yn rhemp ac yn faen tramgwydd i ffyniant 'yr eglwys'. Tueddwn i siarad am y mater ond gwastraff ar amser yw hynny heb wneud unrhyw beth yn ei gylch. Mae osgoi newid angenrheidiol yn brifo'r 'eglwys'. Parhau i

wanychu dylanwad ac effeithioldeb yr eglwys mae glynu at hen ddulliau.

Addasu a Phontio

Onid yw'n cyndynrwydd i newid ac addasu'n golygu'n bod yn esgeuluso rhan bwysig o'n cenhadaeth, yn enwedig ymhlith y to iau? I ba raddau rydym ni, er enghraifft, yn elwa ar y ffaith fod canran y plant 5-15 oed sy'n medru siarad Cymraeg yng Nghymru wedi dyblu er 1981? I ba raddau hefyd y defnyddiwn beibl.net, y fersiwn sgysiol ac anffurfiol ei naws o'r Ysgrythur sydd mor hawdd ei ddarllen, i bontio rhwng capel a chymuned?

Arloesi Heddiw

Diolch byth fod yna gapeli sy'n barod i newid i gwrdd â gofynion cyfoes. A chymwynas fawr â ni fyddai cynnwys yn y Pedair Tudalen gyfres o astudiaethau achos i ddangos i ni sut mae rhai o'r capeli hyn yn arloesi heddiw er mwyn i ni ddysgu oddi wrthynt. Oes, mae gwir angen newid. Wedi dweud hynny, mae lle i lynu hefyd – nid wrth hen rigolau ond wrth yr hyn sy'n wirioneddol bwysig, sef dod yn un teulu a 'byw i Grist'.

RAC

(Nid yw cynnwys y Barn Annibynnol o reidrydd yn adlewyrchu safbwynt Undeb yr Annibynwyr na'r tîm golygyddol.)

CYMANFA ANNIBYNWYR MÔN

Daeth Annibynwyr Môn ar ei gilydd unwaith eto eleni i glodfori'r Arglwydd mewn gair a chytgord. Arweinydd y gân oedd Mrs Catherine Blackwell a'r organyddes oedd Mrs. Margaret Roberts. Llywydd y gweithgareddau oedd Mrs Catherine Evans. Dwy o aelodau Moreia. Gwalchmai, sef Morfydd ac Edna Jones a arweiniodd y gynulleidfa mewn defosiwn. Cafwyd eitemau bendithiol iawn gan Lleisiau Llannerch ynghyd ag unawd gan Margaret Hughes a Heulwen Price dan arweiniad Grês Pritchard. Talwyd y diolchiadau gan Gadeirydd y Pwyllgor y Parchedig Ddoethur Dafydd Wyn Wiliam i bawb a ysgwyddodd y baich i wneud y Gymanfa yn llwyddiant yn enwedig Mrs Margaret Thomas am ei gwaith ffyddlon i'r Gymanfa ers dros naw mlynedd.

Newidiadau

Y flwyddyn nesaf bydd y Gymanfa Sirol yn cael ei chynnal gan aelodau tair Eglwys Annibynnol Caergybi.

Wedi pymtheg mlynedd o ymroddiad wrth y llyw fel Cadeirydd y Pwyllgor, cyhoeddodd Mr William ei fod ef a'r ysgrifenyddes Mrs Margaret Thomas yn gorffen eu swyddogaeth ar nodyn llwyddiant Cymanfa Moreia. Dymuna dilynwyr ffyddlon y Gymanfa Ganu Sirol ddiolch yn gynnes iawn i'r ddau am ysgwyddo y gweithgareddau a chynorthwyo y capeli i drefnu eu rhaglen oddi mewn i'r dosbarthiadau. Offrymwyd y fendith gan y Parchedig Richard Williams Moreia.

Pwyllgor Newydd

Dewiswyd Mrs Catherine Evans Moreia i ymgynnull ynghyd cynrychiolwyr yr Eglwysi i greu pwyllgor newydd. Taer erfynnir ar bawb sydd â chefnidir cerddorol, cariad at ganu mawl, aelodau'r Cwrdd Chwarter a chyn ddilynwyr ffyddlon y Gymanfa Ganu i wneud pob ymdrech i ddod i'r pwyllgor. 'Mewn nifer mae nerth' "Dowch hen ac ifanc dewch at Iesu .."

(Cynhaliwyd y Gymanfa eleni yng nghapel Moreia, Gwalchmai nos Sul Medi 18 am bump o'r gloch.)

Donald Glyn Pritchard,
Capel Ifan.

Cynhelir y cyfarfod nesaf o Gyngor yr Undeb yng Ngregynog ar **ddyddiau Gwener a Sadwrn, 7-8 Hydref.**

Edrychwn ymlaen at gael croesawu cynrychiolwyr y Cyfundebau yno.

Geraint Tudur

Opera Porth Tywyn
yn cyflwyno Saint-Saens
Samson a Delilah

Neuadd Goffa Porth Tywyn
Hydref 19, 21, a 22 am 7pm

Tocynnau: 01554 835659

Cynhelir
Cyfarfod Sefydlu
Y Parchedig Carwyn Siddall

yn weinidog ar

Eglwys yr Annibynwyr, Y Bala
ac i groesawu'r Eglwys yn rhan o Ofalaeth Bro Llanuwchllyn a'r Cylch
Ddydd Sadwrn, Hydref 8fed, 2016
am 2.30 o'r gloch

yng Nghapel yr Annibynwyr, Y Bala.

Croeso cynnes i bawb